

SAVOGNIN: Canorta Tgimirola

# La canorta marscha ossa treis meis

**pb.** Igl decembre 2014 è neida fundada la Canorta Tgimirola a Savognin scu filiala dalla «Kinderkrippe Purzelbaum» a Valbella. All'antschatta matg da chest onn ò la canorta d'unfants a Savognin davert las sias portas ainten las localitads dall'uriunda «La Cantina». A parteir da chest'emda èn 9 unfants an tgira e survigilaziun ed igl persunal è er segl post. I vagn fatg ena visita.

Diversas donnas giovanas da Savognin e conturn on già l'ideia e l'iniziativa per ena canorta d'unfants. Cun «La Cantina» ins ò già spartamaintg localitads adattadas e cun igl sustign digl cumegn da Savognin ins ò er dastgea chintar. Ossa duvravogl angal ple igls purtaders. E cò ins ò santia dalla «Kinderkrippe Purzelbaum» a Valbella. Ena organisaziun tgi dat siva digl 2010 e tgi survigilescha u dat giantar a total ca. 60 unfants. Vot deir, chegl èn betg mintga de tants, ma repartia sur igls tschintg deis dall'emda da labour.

Per la filiala a Savognin ins ò eligia cun Monika Battaglia e Bettina Bergamin dus donnas digl i ainten la suprastanza dall'uniun. Ed ossa ins ò pudia antschever cun l'organisaziun. Igl mars è anc nia organiso en de da rimnada per la canorta cun bung success. Ins ò survagnia mobiglia, tarmagls, gis, vistgadeira ed er donaziuns an daner. Siva ègl sto da vurdar per igl persunal, uscheia tgi ins possa darveir la «Canorta Tgimirola» scu previa all'antschatta matg e chegl è er sto igl cassa.

## Chels tgi portan unfants en automaticamaintg commembers

Purtader dall'antiera organisaziun è l'uniun Purzelbaum cun 45 commembers. E commember pò atgnamaintg davantar mintgign. Educatours tgi portan unfants an tgira èn automaticamaintg commembers.

Presidenta dall'uniun è siva dall'antschatta Christiana Hemmi. Scu mussadra cun 15 onns experientscha professiunala, ò ella las duevlas premissas per manar l'uniun. Ella è er l'amprema manadra dalla «Canorta Tgimirola» a Savognin an en pladimaint parzial da 30 %, tgi varda tgi la filiala funcziunga, tgi igl persunal basignevel seia avant mang, parta aint chel ed ò er igl contact direct cun igls educatours tgi vottan purtar lour unfants ainten la canorta. «Scu presidenta dall'uniun vigna a ma retrer alla fegn digl onn, essend tgi scu manadra dalla canorta a Savognin na saia betg esser partunga da mamez», dei la donna da Lai.



Igl persunal tgi survigilescha actualmaintg la canorta a Savognin: (da san.) Pascale Layaa-Laulhé è subsituta dalla manadra e survigiladra an pladimaint dad 80 %, Sarina Collet lavoura 40 % scu survigiladra, Marina Carisch ò antschet glindesde scu survigiladra 100 % e Sandra Arpagaus è survigiladra cun 49 %.

An general manegia ella, tgi ins vegia bagn già er da batter cunter pregiudezis ainten la populaziun, perchegl tgi ins ò magari anc adegna l'impressiun tgi igls genitours vessan da tgirar sezs lour unfants. «Oz dattigl pero mammas tgi edutgeschan sulettes lour unfants, i dat er igl cass tgi ins dovrà las antradas dalla donna tgi vo a luvrar per neir surave. Chegl è savens er igl cass tar persungas digl exteriour», dei Christiana Hemmi. Igls taimpseian sa midos, ma la tgapientscha vigna er cò adegna pi gronda. Digl reminent è er la tgira e survigilaziun ainten la canorta betg gratuita. Las tariffas sa drezzan tenor las antradas digls educatours.

## Cleras reglas da surangiu

Da manar ena canorta n'è betg ena tgossa schi simpla. I sa tracta alla finala dad unfants tgi ins dat an responsabladad. E cò vottigl urden e disciplina. Cantun e confederaziun geidan finanzialmaintg tar la partenza dad ena canorta, els fon pero er cleris pretensiuns. Gist an chegl tgi pertotga las localitads ston esser adempleidas tschertas premissas punto la purscheida, la grondezza etc. Ed er igl persunal da survigilaziun stò esser scolo ade-

quatamaintg. Aglmanc ena part digl persunal stò aveir ena scolaziun. Igl solit è chegl ena scolaziun scu educatours dad unfants pitschens (FaBe): «Cò vasainsa er en aspect positiv dalla canorta d'unfants. I dat er novs posts da labour ainten la regiun. E mattas tgi vevan fatg ena scolaziun dad educatours dad unfants pitschens e rastavan ainten las canortas digls centers, on ossa la pussebladad da luvrar cò», commentescha la manadra.

Per tgi igl travagl funcziunga ainten la canorta dovrà en reglamaint intern. Cò èn fixadas las reglas tgi valan per igls purtaders dalla canorta e per chels tgi fon adiever dad ella. A parteir digl settember dattigl novas reglas.

Alla «Canorta Tgimirola» a Savognin on educatours la pussebladad da purtar lour unfants davent dallas 07.00-08.45 e neir per igls unfants pon els dallas 16.30-18.30. Chegl vot deir tgi en unfant ò ena survigilaziun maximala an de da endesch ouras e mesa. Chegl vala per tot igls deis da labour oter tgi la mesemda. Pero ègl naturalmaintg er pussebladad purtar igls unfants angal mez deis u angal tscherts deis dall'emda.